



МЕСЯЦА ОКТЯБРЯ В 14-Й ДЕНЬ

Святых мученик Назária, Гервасия, Протасия и Келсия

На Господи, возвах: стихиры святых, глас 4.

Подобен: Яко добля:

Иже веры свидетеле, подвиг совершивше/, победы венец прияша/ доблемудренный Назарий и великий Протасий/ с Келсием мудрым, Богомудрый Гервасий./ Ихже воспойм, яко добля оружники,/ яко Вышняго Царствия наследники/ и яко самовольная заколения.

Просветився смыслом светозарения Духа,/ священный Назарие,/ паче солнца, во тьме сущим, возсиял еси душам,/ Божественною благодатию поучая,/ просвещая, наставляя светлейше/ Единого Господа и веровати и чтити,/ воплощенна от Девы преславно/ и земныя осиявшего.

С Назарием возсия приснопамятный Келсий,/ и славный Протасий, и Гервасий,/ доблемудренно пострадавшие/ и вся полки демонския мужески на земли победивше./ Тем точат исцелений струй/ и сердца напаяют богато благочестивых/ Божественною благодатию.

Да восхвалятся Назарий, и да почитется Протасий,/ и Божественный Келсий, и Гервасий,/ иже благославно пострадавшие и леть умалившие,/ и Ангельским ликом священо причитаемы,/ и обожаемы по причастию

Божественному, / и победы венцы от длани Живоначальныя приѣмше.

Яко течение совершивше и веру соблюдоше, / страдания венцы увязостеся / и Ангелом сочетаетеся, / светло храбрствовавше и льстиваго врага о Христе поправше, / Божественнии мученицы. / Сего ради, согласно сошедшеся, / светонбсную вашу память совершаем, веселящеся.

Богомудрый Назарий / Божественным проповѣданием грады проходя, просвети, / егоже подражав, Келсий / славу стяжа Божественных страдалец, поправ льстиваго. / Сия вси похвалами почтим, / яко звезды и светила сущим во тьме / и врач душ наших.

Слава, глас 8:

Жертвы словесныя, / Назария, Гервасия, Протасия и Келсия похвалим, / яко все мучителей неистовство со идола упраздниша. / Тем молитвами их, Христе Боже, / мир миру даруй / и душам нашим велию милость.

И ныне, Богородичен или Крестобогородичен.

Подобен: Мученицы Господни:

Не терплю, Чадо, видящи Тя на Древе уснувши, / бодрость всем подающаго, / яко да древле преступления плодом сном погибельным уснувшим / Божественную и спасительную бодрость подаси, / Дева глаголаше, плачущи, / Юже величаем.

На стиховне Октоиха.

Тропарь, глас 4:

Мученицы Твои, Господи, / во страданиях своих венцы прияша нетленные от Тебе, Бога нашего: / имуще бо крепость Твою, / мучителей низложиша, / сокрушиша и демонов немощныя дерзости. / Тех молитвами / спаси души наша.

Слава, и ныне Богородичен,
аще среда или пяток Крестобогородичен.

НА УТРЕНИ

Оба канона Октоиха и святых канон на 4, егоже краегранисие: Верно воспую мученики венценосныя. Иосифово. Глас 4.

Песнь 1

Ирмос: Отвѣрзу уста моя, / и наполнятся Духа, / и слово
отрыгну Царице Матери, / и явлюся, светло торжествуя, /
и воспою, радуясь, Тоя чудеса.

Верно пострадавше и подвиг скончавше, / по-
беды венцем увязостеся, Божественнии
мученицы. / Божественную вашу память тем
празднуем, веселящися.

Вѣтрилом вперяеми Духа Божественнаго, / пу-
чину немокренно преидосте, мученицы славнии,
мучений / и ныне к Божественному пристанищу
Вышняи светлости вселитесь.

Крестом, якоже бронями, одеяни, блаженнии, /
врага безплотнаго поратовасте в теле, / томления
многоплетенная и смерть неправедную претер-
певше.

Богородичен:

Едину, вместившую Превечнаго Господа во
утробе, / Всенепорочную Отроковицу воспоим, /
яко бысть Небес пространнейши, Бога воплотив-
ши благодати ради.

Песнь 3

Ирмос: Твоя песнословцы, Богородице, / живой и неза-
вистный Источниче, / лик себе совокупльшия, духовно
утверди, / в Божественней Твоей славе / венцев славы
сподоби.

Яко гроздие Божественнии бысте Винограда
Божественнаго истинно, / страдания изливающие
вино нам, мученицы, / духовно веселящее всех
сердца благодатию.

Крепко противился еси гонителю, Назарие,
мучениче Христов, / повелевающе мерзким тебе
богом жрети, пребогате, / яко агня заклению
готов был еси, славне.

Хваления вси согласне воспоим днесь верно /
Назарию, Гервасию, Протасию и Келсию, / Исти-
ны свидетелем, бывшим в Дусе.

Богородичен:

Закона прообразовавше скиния Тя быти хотя-
щую, Чистая, / Божие священное жилище: / из
негоже Очищение наше, святыню даруяй всем
нам, приидет.

Седален, глас 8.

Подобен: Премудрости:

Назариевы страсти и гонения, / Протасиевы
 болезни и раны чтуще, / Гервасия хвалим и
 Келсия, Святыя Троицы сосуды честныя, / свет-
 лья звезды, верных предстолпя, / нечестия ист-
 иннии потребители, / и столпы веры, и утвер-
 ждение непоколебимо. / Имже верою возопийм: /
 молити Христа Бога грехов оставление
 даровати / чтущим любовь святую память вашу.

Слава, и ныне, Богородичен:

Яко Деву и Едину в женах, / Тя, без семене
 рождшую Бога плотию, / вси ублажаем рóди
 человечести: / Огнь бо вселися в Тя Божества, /
 и, яко Младенца, питаеши Зиждителя и
 Господа. / Тем Ангельский и человеческий род
 достойно славим пресвятое Рождество Твое / и
 согласно вопиём Ти: / моли Христа Бога согрешен-
 ний оставление даровати / поклоняющимся ве-
 рою пресвятому Рождеству Твоему.

Крестобогородичен:

Агница, и Пастыря, и Избавителя / Агница
 зрящи на Кресте, восклицаше, плачущи, / и,
 горько рыдаючи, вопияше: / мир убо радуется,
 приемля Тобою избавление, / утроба же Моя
 горит, зрящи Твое распятие, / еже терпиши за
 милосердие милости. / Долготерпеливе Господи,
 милости бездно и источниче неисчерпаемый, /
 умилосердися и даруй согрешений оставление /
 верою поющим Божественныя страсти Твоя.

Песнь 4

Ирмос: Седяй в славе на Престоле Божества, / во
 облаце легце / прииде Иисус Пребожественный / нетлен-
 ную дланию и спасе зовущия: / слава, Христе, силе Твоей.

Паче смысла святых мученик Твоих любовь
 превосходит вся помышления, Слове, / борения, и
 мужественныя подвиги, и натрижнення, / яже
 подал еси законно им, пострадавшим.

Един разум в разных ураняеми телесех Хри-
 стовы оружницы преизлишно показаша, / Едина-
 го Бога в триници исповедаша / и многобожия
 леть яве погубиша.

Назáрия, Протáсия, Гервáсия и Келсiя, честнѣхъ мучениковъ, / Ангели борéнию подивѣшася, / како в плóти безплóтному сплетáющеся, / низложиша сего на землю мѹжественнойше.

Яко дóблии вóини, яко непобедими мученицы, / яко Христовы ору́жницы и яко благочестия побóрницы / Небесная селения наследовасте и ликомъ Ангельскимъ всегда свеселящеся.

Богородичен:

Не истощѣвъ Отеческихъ, Пребожественный, Пречистая Богородице, недръ, / в нѣдрехъ Твоихъ пречистыхъ седѣтъ, / Божественное седáлище всемъ благостынею готовляя / и славу, присно пребывáющую.

Песнь 5

Ирмос: Ужасóшася всяческая / о Божественней слáве Твоей: / Ты бо, Неискусобráчная Дéво, / имéла еси во утрóбе надъ всеми Бога / и родила еси Безлётнаго Сына, / всемъ воспева́ющимъ Тя / миръ подавающая.

Ранамъ тело твое, Назáрие, приобщѣся, ўзамъ многобразныхъ мукъ, / миро благовонное темъ источáетъ намъ, облаговонствующее дѹши / верою несомненною тя почитающихъ, всехвальне.

Кроплéньми кровей твоихъ погасил еси ўглие многобожия, стратотерпче, / Божественныхъ чудесъ огнемъ же, всемудре, тѣну страстейъ лѹтыхъ пожигаеши, / Божию благодатию Спáсовою, Назáрие.

Цвѣты, дыха́ющие воню́ Божию знания, / Богознания злáчники, / райская древесá благоплóдная, предóбрыя и светозáрныя, почтѣмъ мученики / и верно ублажѣмъ.

Да поетсяъ Назáрий, да величается Келсiй, / кѹпно с Протáсиемъ дóблѣй да похвалится верою Гервáсий, / Церкви непреклоннии столпѣи и основанiя нерушимая бывшии.

Богородичен:

Оружие, древле Едемъ стрегѹщее, плещѣи вернымъ подаётъ, Чистая, / знаменаннымъ честнóю Кровию, прежде источѣвшеся отъ ребръ копийъ прободениемъ, / из Тебе Возсиявшаго.

Песнь 6

Ирмос: Божественное сие и всечестно́е / совершающе
празднество, / Богомудрии, Богоматере, / приидите, рука-
ми восплещим, / от Нея рожда́гося Бога сла́вим.

Твоя шествия на вода́х быша, всеблаженне
Наза́рие, / и не позна́шася сим следы́ твоя в
Душе, / Егоже силою вся враги посрамил еси.

Телес стра́сти неисцельныя Божию благода-
тию исцелил еси, мучениче Наза́рие, / миро
благовонное источа́еши же / твоим честны́м мо-
ще́м приближа́ющимся.

Яве Божественный Прота́сий, великий же с
ним Герва́сий, / богатство привременное и мо́гут-
ство попра́вше, / вечныя славы сподо́бишася.

Богородичен:

Законь Едина обновила еси естества, Дево, /
рождши Бога Безсмертнаго, в плоть ме́ртвенную
оде́явшася, / да мертвыя оживи́т благостию.

Кондак, глас 2.

Подобен: Вышних ища:

Свети́льницы светлии явльшеся, / Божествен-
нии мученицы, / тварь светом чудес озаряете, /
неду́гов разрешающе глубокую ночь всегда / и
Христу Единому Богу моля́щеся / непрестанно о
всех нас.

Икос:

Яко светоза́рнии и Божественнии све-
ти́льницы, / Свету Великому предстояще прис-
но, Богоблаженнии мученицы, / и оттúду испуща́-
емыми невечерняго Божества́ сиянии всегда
просвещаемы и обожáеми, / верою память вашу
совершающия Божественную просветите, / и ом-
рачэ́ния, и страсте́й, и бед, и злобы избавите, /
моля́щеся непрестанно о всех нас.

Песнь 7

Ирмос: Не послужи́ша твари Богомудрии / паче
Сзда́вшаго, / но огненное преще́ние му́жески попра́вше, /
ра́довахуся, поюще: / препетый отец Господь и Бог,
благословен еси.

На ка́мени Божественнаго знания утверди́вше
стопы́, славнии, / сердец ваших вражиими ухищ-
ре́ньми не преврати́сте, воспевающе: / препетый
отец Господь и Бог, благословен еси.

Свет невечерний страдавшим кровию вам возсия, / и веселие я́ве вас прият, великомученицы, воспевающих: / препетый отец Господь и Бог, благословен еси.

Освятите преусердно проходяще грады, блаженнии, / исповедающе Христа пред мучители и всем исцеления подающе требующим / благодатию Духа Всесвятаго.

Богородичен:

Светлейшую палату обрёт Бог утробу Твою, в сию вселіся, / сыны соделова я света, Всенепорочная, зовущия: / отец наших Боже, благословен еси.

Песнь 8

Ирмос: **О**троки благочестивыя в пещи, / Рождество Богородичо спасло есть, / тогда убо образуемое, / ныне же действующее, / вселенную всю воздвизает пети Тебе: / Господа пойте дела / и превозносите Его во вся веки.

Утренююще к возсиявшему из Девы преславно великому Солнцу, / мученицы непобедимии свет бысте и прелести тьму благодатию разористе: / Господа пойте, вопиюще, дела и превозносите Его во вся веки.

Рим древле подвиги твоя проповедает, Назарие многотрадальне, / Константиноград поет чудеса, священныя твоя мочи верою содержаая, / Господа пойте, вопиющий, дела / и превозносите Его во вся веки.

Божественный Назарий, источая мира благодати, / повелевает всем притекающим верою почерпати / на просвещение и очищение, взывающим: / Господа пойте дела и превозносите Его во вся веки.

Вас, доблия страсготерпцы, / Назария, Келсия, Протасия, паки же Гервасия, / молебники ко Господу крепчайшия имуще, любовию зовем: / Господа пойте дела и превозносите Его во вся веки.

Богородичен:

Плотию соединився Тебе по существу, / всем, еже быти, Подавай, / всего мя обнові, всего назда, обветшавшаго, Пречистая, преступленьми. / Тем Тя, Деву, поём и превозносим во вся веки.

Песнь 9

Ирмос: Ева убо недúгом преслушания / клятву вселила есть, / Ты же, Дево Богородице, / прозябéнием чревоношéния мýрови благословение процвелá еси: / тем Тя вси величаем.

Крепостию вжиляеми Христа, разбóршаго злóбу губителя, / преклонивше сему в́ью, конец мечém при́ясте, / разрéшшися от плóти, великоимен́тии: / тем достойно блаж́ими естé.

Красн́и язвами плотсќими б́йте и Ангелом уподóбистесь; / ныне же предстоитé всех, раду́ющесь, присно красотé, / причастием я́ве удобря́еми, красн́ейше, всечестн́ии.

Зна́менъми и чудесы вас украси́ / и прежде конца, всеприснопа́мятнии, и по конце Владыка, / Назáрие, Протáсие, Келси́е, Герв́асие, непобедими мученицы, / тем достойно ублаж́аетесь.

Освят́ишася любовью вашею всяческая, соверша́ющи память днесь: / радуются мученицы и вси пророцы с нами прáзднуют, / с нимиже о нас мо́литесь Благодетелю, всеблаженнии.

Богородичен:

Глас Ти Божественнаго Гаври́ила приносим, веселя́щесь, Отроковице Пречистая: / радуйся, Обрадованная, / мучеников, апостолов похвало и всех верных спасение, / Дево Мати Неискусобрачная.

Светилен.

Подобен: Духом во святилици:

Претерпéл еси, яко безплотен, нестерпимыя мýки, Назáрие блаженне, / мучеников слава, с Герв́асием мудрым, / Протáсием же кúпно и Божественным Келси́ем. / Тем верою чтим всепразднственную вашу и честн́ую память.

Богородичен:

Паче ума Рождества Твоего преславное чудо / удивляет всяк смысл, и земных, и Ангел: / Дева бо сýщи родила́ еси, и Дева пребыла́ еси, яко прежде рождества, Дево. / О страшнаго та́инства! О рождества д́ивнаго! / О чревоношéния преславнаго!



В
ТОЙЖЕ
ДЕНЬ

**Преподобнаго отца нашего Никóлы Святóши,
князя Черниговскаго
НА ВЕЧЕРНИ**

Блажен муж: 1-й антифон. На Господи, воззвах: стихиры на 6, глас 8. Подобен: О преславнаго чудесе:

Богомúдре блаженне Никóло, / ты, видя, яко прехóдит мира сего образ / и тлéнию вся причáстна суть, / образ славы своея скоро изменил еси, / диадúму и скипетр оставил еси / и, к Небесному Царствию взирая, / тесный путь изволил еси шéствовати; / и ныне в Небесных селених живýй, / Христу Богу моли́ся / прияти нам Вечнаго Царства блаженство.

Преподóбне Никóло, / ты по имени твоему и житие хотя́ стяжати беззлобно, / мир сей победи́л еси, / престол кня́жества оставил еси, / богатство, славу и владычество, аки умéты, вменяя, / во убо́гий образ иноческий облекся, / обнищавшему нас ради Христу последовал еси, / Емуже ныне предстоя, / о нас прилежно моли́ся / дарова́ти душáм нашим мир и вéлию милость.

Святе Никóло, отче блаженнейший, / провидя умным твоим оком, / яко цáрие и князи славы своея лишáются и нáзи во гроб отходят, / отверглся еси подобосéнные власти века сего, / Христовым стопам следуя, / Тому во смирении работал еси, / темже улучил еси нестарéющеся блаженство, / идеже помяни и нас, чтущих память твою.

Слава, глас 2:

Царство Твое, Христе Боже, / и владычество Твое пребывающее во веки провидя, / угодник Твой Никола скипетр и диадúму отвéрже, / и многопечалия удалися, / к безмятэжному житию йночествующих притек, / бысть раб йстинен и верен, / Тебе Спасу своему послужив в преподóбии и правде.

И ныне, Богородичен: Прейде сень законная: Таже вход, прокимен дне. И чтения три преподобническая. (зри страницы 791—792).

На стиховнах стихиры, глас 1:

Подобен: Небесных чинѡв:

Божественным желанием разжизаем, / преподобне отче Николо, / мирскую славу преобидел еси / и, иноческое житиё возлюбив, / был еси преподобным отцем единоревнителъ, / с нимиже ныне водворяяся, / моли о чтущих твое преставление.

Стих: Блажен муж, бояйся Господа, / в заповедех Его восхощет зело.

Христови весь поработился еси, / вперив все свое желание к Нему, / Егоже ради любви мира сего отрелся еси, / возлюбив Возлюбившаго род человеческий; / сего ради ты песньми ублажаем / и любовьию кланяемся раце мощей твоих.

Стих: Блажени вси, боящиеся Господа, / ходящии в путех Его.

Всех любовьию чтущих тя / заступления твоего не лиши, отче, / но еликомощно предстательствуй всем / и пособствуй в бедѡх и напѡстех, / полезная подавая молитвами твоими.

Слава, глас 5:

Преподобне отче, / не дал еси телу твоему упокоения, / дѡндеже страсти сердца твоего очистил еси, / Христова повеления исполняя, / дом, сродники и други оставил еси, / к тихому пристанищу Бѡжия Мѡтере притек, / величество и славу свою всем под ноги покорил еси, / в посте просяя, тело умертвил еси / и, Духом Божиим водаяся присно, / сын и наследник Присносущнаго Света показался еси, / идеже ныне живый, / моли улучшить и нам милость в день Судный.

И ныне, Богородичен:

Обрадованная, ходѡтайствуй Твоими молитвами, / и испроси душѡм нашим множество щедрѡт / и очищение многим согрешением нашим, молимся.

Тропарь, глас 2:

Отечество и славу княжения твоего оставил, / Князю смирения, Христови, усердно последовал еси, / преподобне отче наш Николо; / тем приял еси от Него вечное царство и славу на Небеси, /

идеже ликуя, поминай нас чтущих память твою верно.

Слава, и ныне, Богородичен: Вся паче смысла:

НА УТРЕНИ

По 1-м стихословии седален, глас 1.

Подобен: Гроб Твой:

Веселия исполняются Россійстии людие/ и радостне поют твою память, блаженне,/ имуще тя скорого в бедáх помощника/ и во всех болезнях избавление:/ сего ради, яко приемый от Бога благодать словом недуги прогоняти,/ не отступи и ныне, всем посóбствуя,/ честнóе твое усение почитáющим.

Слава, и ныне, Богородичен:

Источник исцелений вéдуще Тя, Дево,/ в теплоте сердца прибегаем, грешнии раби Твои;/ Ты же срóдное имущи о нас промыслéние,/ не забуди волнуемых напáстьми:/ но, простерши длани, молися Сыну Своему,/ яко да примем тех скорое пременение.

По 2-м стихословии седален, глас 4.

Подобен: Явился еси:

Яже на земли в суетé преходящая возненавидев, блаженне,/ и яже на Небеси присносущная от сердца возлюбив,/ сия по многих твоих трудéх и наследовал еси,/ идеже живый, о всех нас молися Христу, преподобне,/ в песнях твою память почитáющих.

Слава, и ныне, Богородичен:

Обновíла еси, Дево, святым Рождеством Твоим/ истлевшее страстьми земнородных естество/ и возстáвила еси всех от смерти к жизни нетлénней./ Тем Тя по долгу, Мати Чистая, присно ублажаем/ яко блажимую во вся верных роди.

По полиелеи седален, глас 8.

Подобен: Повеленное тайно:

Да радуется днесь святы́й твой прародíтель,/ на высоте престола седýй равноапостольный Владимир,/ яко от кóрене его, благая ветвь, прозябл еси ты, преблаженне Николо,/ носящи на себе плод духовный,/ во образ всем хотящим спаст́ся/ и Христу во смирении послéдовати,/

якоже ты, преподобне отче, сотворил еси;/ и ныне во славе радуешься ти,/ плод иноческих трудов твоих пребывает во веки.

Слава, и ныне, Богородичен:

Да радуется днесь Давид песнописец,/ яко от корене его возрастé нам мысленное древо, Дева Мария,/ носящая плод Христа Бога нашего,/ Имже питаются всего мира концы и причастницы бывают вечныя жизни,/ тем, вси вернии, яко Богородицу благочестно ублажаем.

По 50-м псалме стихира, глас 6:

Велие смирение жития твоего, отче наш,/ ибо вся земная: род и престол княжения своего, оставив,/ Единого Христа возлюбил еси,/ и Тому чистою совестью служа,/ на земли Ангельски пожил еси,/ бесовския полки прогнав еси, возшед на высоту добродетелей,/ блажен еси тако Христу работав;/ и мы убо труды твоя познавше,/ любовью тя ублажаем.

Канон преподобному, глас 4.

Песнь 1

Ирмос: Отверзу уста моя,/ и наполнятся Духа,/ и слово отрыгну Царице Матери,/ и явлюся светло торжествуя,/ и воспою, радуясь, Той чудеса.

Отверзи мне устне, Христе мой, послы Параклита,/ да Твоего угодника пети возмогу стихословии высоту добродетелей,/ на нюже в чистоте сердца смирением взыде.

В правду нареклся еси Святоша:/ исполнь бо сый святыни, всякаго непреподобнаго действия удалися еси/ и, к Боговидению ум свой вперив,/ оттуду познал еси вся, яже в мире суетная быти.

Прежде тебе бывших помянул еси,/ от колския славы напрасно отпадóша, и с безчестием пожат серп смерти;/ сего ты да избáвишися, престол на земли княжий оставил еси,/ и приял еси на Небеси престол, иже пребывает выну со святыми.

Блаженному Иоасафу Индийскому поревновал еси:/ якоже бо той остави царство земное и взыска Небесное,/ тако и ты, блаженне, временное княжение оставль, приял еси вечное.

Богородичен:

Вышняго Царствия не лиши мя, / Небесными и земными Владычествующая Госпоже, / сего бо ищя, удаляюся, обладаем воюющими всегда на мя страстьми, / обаче к Тебе несумненною надеждою прибегаю.

Песнь 3

Ирмос: Твоя песнословцы, Богородице, / живый и независный источниче, / лик себе совокупльшия, духовно утверди, / в Божественней Твоей славе / венцев славы сподоби.

Раб Единому Богу да будеши, не восхотел еси работати миру, / от негоже изшед, аки второй Авраам, дом и землю свою оставил еси / и пришед, аки в Харрань, в пречестную Божию Матере Печерскую обитель, / видел еси лествицею деяния и ведения блаженных отец к Небеси восходящих.

Господин сый иногда княжению своему, / за любовь Господа своего сотворился еси раб, / служба рабом Христовым в поварни, / да бывшему нас ради Послушливу до смерти последуеши.

Порфирию одеян и в руке имей скипетр, / не устыдился еси на раменах дрова носить и сеци руками своима; / да вся уды в поработение предаси Вышнему Владыце, / от Негоже возмездие приял еси живот вечный.

Мирстии мирская мудрствующе, братия твоя, блаженне, / мняху деяние твое в поварне безчестно быти, / тем и развращаху тя, да оставиши сие. / Но ты, любя послушание сие, / еще едино лето испросил еси себе в том пребывать.

Богородичен:

Заповедем Господа моего не повинующася, ни хранящаго послушания уставы, / убедй мя, Владычице моя, к деланию тех / и укрепи в прочее время в обоих совершенно исправитися, / да не в лености скончався, с непотребными рабы казнь прииму по делом.

Седален, глас 8:

Яко истиннаго послушателя Евангельскаго слова, / и иноков любителя, и ревнителя преподобным, / приидите, братие, песненными

хвалами воспоем блаженнаго Николу:/ той бо тело свое поработи Богу, да душу свободит от страстей/ и, аки солнце, возсияв лучами добродетелей своих,/ всех нас озаряет, поющих:/ слава Богу, призывающему рабы Своя в вечное спасение.

Слава, и ныне, Богородичен:

Вышняго мя гражданина покажи, Чистая Дево,/ прибегающаго к Твоему покрову и просящаго от Тебе теплаго заступления,/ яко, да Тобою обрет благодать, воспую:/ слава Богу, спасающему род человеческий.

Песнь 4

Ирмос: Седяй в славе на Престоле Божества/ во облаце легце,/ прииде Иисус Пребожественный/ нетленною дланию и спасе зовущия:/ слава, Христе, силе Твоей.

Седяй во славе прежде на престоле и вельможам предстоящим ти,/ не устыдѣлся еси, блаженне, седѣти при вратѣх монастырских три лета,/ яко верно храняй сих вход от бездельно влазящих.

Председящу ти пѣрвее на трапѣзе любопищней/ и многим рабом служащим яко владыце,/ не возгнушался еси последѣ, святе, раб быти рабом Христовым,/ тем служба и представляя брашна от Божияго дарования.

Якоже степенями на высотѣ мирския славы возшедши, имут упокоение по трудех,/ тако и ты, преподобне, советом игумена и братии вся послушания чины прошед,/ принуждѣн с миром в келлии безмолвствовати и внимати спасению своему.

Яко трудолюбивый раб, умножая Владыце своему талант,/ не дал еси упокоения многотрудному твоему телу,/ но рукама своима насадил еси вертоград;/ и видеша братия трудов твоих плоды.

Богородичен:

Ленящаяся мя, на добродетели понуди, Богородице,/ и даждь ми вертоград душевный мысленными деревьями насадити,/ слезами умиления напаяти, и принести Владыце моему сторич-

ный плод, / да и аз с верными рабы Его приму
от руку́ Его мзду трудов моих.

Песнь 5

Ирмос: Ужасошася всяческая / о Божественной славе
Твоей, / Ты бо, Неискусобрачная Дево, / имела еси во
утробе над всеми Бога / и родила́ еси Безлетнаго Сына, /
всем воспевающим Тя, / мир подавающая.

Дивля́хуся вси трудолюбю твою,
блаженне, / яко никогдаже виден был еси
празден, / но в руках дело, в устех же имел еси
выну молитву Иисусову / и сею отразил еси беса,
празднолюбием нападающаго.

Да пици Небесныя причастник будеши, сла-
столюбия отверглся еси: / ничтоже бо ядыше,
кроме от ово́щия монастырскаго мало / и тако
соблюл еси чистоту души и тела.

По многих твоих постнических трудах / приял
еси от Бога дар едином словом недуги исцеляти и
пособствовати в скорбех. / Молюся ти, и мене от
одержашаго недуга в здравие премені скоро.

Многоплетёнными сётми тщася враг / отврат-
тити Боголюбивую душу твою от добраго трудо-
любия пути, / наусті некогда служащаго тебе
врача; / ты же, святе, увещанием увещал еси
того, / яко да не тебе, но своему спасению
внимает.

Богородичен:

Сердцем и душою развратихся / и, отвергшись
данныя ми благодати, в неподобныя хожду
пути, / но, прежде даже не впаду в руке врагом, /
Ты, Мати Божия, управи мя на первое
блаженство: / овчá бо есмь спасенныя Твоей
ограды.

Песнь 6

Ирмос: Божественное сие и всечестно́е / совершающе
празднество, / Богомудрии, Богоматере, / приидите, рука-
ми воспещем, / от Нея рождшагося Бога славим.

Божественным желанием к Божией любви
устремився, / вся находящия ти скорби, блажен-
не, сладце терпел еси, / рассуждая реченное, яко
недостойны суть страсти века сего к хотящей
явиться в нас славе.

Увещава́ющему тя Петру врачу от трудов
 иноческих преста́ти / целомудренно отве́щал еси
 мно́гажды, святе: / преста́ни, отвращая мя от
 сицева́го начинания, / ни скорбь бо, ни глад, ни
 теснота отлучит мя от любви Христовы, / ея́же
 ради терплю вся находящая на мя.

Да во Христе Живот Вечный обрящеши, /
 умертвил еси тело твое многим воздержанием и
 трудом / и не лишился еси, Егоже желал: / се бо
 ныне живещи со святыми во дворех Небесных.

Еди́наго имея врача Христа, / никогдаже попу-
 стил еси себе в болезни врачевати, / но глаго́лал
 еси со Апостолом: / мне еже жити Христос, а еже
 умре́ти приобре́тение, / и сим словом сам свой
 недуг исцелял еси.

Богородичен:

Изнемогшую мою душу от грехов многих, /
 посещением Твоим исцели, Госпоже́, / и водою
 благодати Твояе напо́й мя, / да свобод сый ду-
 шевных и телесных недугов, / поработаю Тебе,
 Владычице моей, со усердием всегда.

Кондак, глас 8:

Вся кра́сная мира сего / и тленное богатство
 нивочтоже вменив, / обогати́лся еси многими чу-
 десы и зна́мении от Христа Бога, / Ему́же в ве-
 селии предсто́я, / поминай нас, чтущих любовью
 память твою, да зовем ти: / радуйся, Никóло
 пречудне.

Икос:

Ангельски на земле поживша / и со Ангельски-
 ми чини́ми ныне светло на Небесе́х ликующая, / тя,
 блаженне, сими ублажаем песньми: / радуйся,
 ро́да светлость и княже́ние презре́вый; / радуйся,
 богатство и славу тщетную попра́вый; / радуйся,
 нищ и убо́г, вся оставль, Господеви
 последова́вый; / радуйся, гордость низложивый и
 смирению прилежа́вый; / радуйся, вся послуша-
 ния монастырская проше́дый; / радуйся, в тех со
 всяким смирением пребы́вый; / радуйся, повар-
 ства и вратарства невозгнуша́выйся; / радуйся,
 братьи́ твоих, князей, отвергийся сожительства; /
 радуйся, сам от немощи возмогий и врача

исцели́вый;/ радуйся, спасение враче́ви моли́твами твоими исходáтайствовавый/ и свою, и онаго смерть прозревый;/ радуйся, брату твоему по умёртвии твоём исцеление пода́вый,/ радуйся, всем тёпле ты призывающим чудный и скорый помощниче,/ радуйся, Никóло пречúдне.

Песнь 7

Ирмос: Не послужиша твари Богомудрии/ паче Создавшаго,/ но огненное прещение мужески попра́вше,/ радовахуся. поюще:/ препе́тый отцев Господь и Бог благословен еси.

От ко́ликия славы прешел еси, княже, глаголаше ти Петр,/ и укоря́ше тя, блаженне, яко всем работаеши и сме́тищу* приседи́ши,/ но ты отве́щал еси ему:/ не погубих чести моея, паче же сим прославля́юся,/ последуя всем пришедшему послужити Христу, Емуже и зову,/ благословен Бог отец наших.

Тебе хотя́й в болезни Петр уврачевáти, сам разболеся,/ егоже не зéлием, но молитвою исцелил еси/ и наказал того не надеяться на врачевную хитрость,/ но токмо на Бога уповати, зовущи:/ препетый отцев Боже, благословен еси.

Послушание твое у врат скончавáя,/ провидел еси, святе, по триех месяцев и живота твоего кончину,/ тем призвал еси Петра и увещавал еси,/ да восприимет zde иноческий образ и вместо тебе послужит Богу,/ Иже есть благословенный во веки.

Изменéние жизни твоея слышав Петр,/ припаде со слезами к ногам твоим, преподобне,/ рыдаючи, яко лишается господина своего;/ ты же воздвиг его, утешал и увещавал еси не скорбети о сем, но звати:/ благословен Бог отец наших.

Богородичен:

Изменéния жизни моя скверных ради дел не имúща,/ кто мя не воспла́чет, отхожду бо в путь невéдом./ От пути за́поведей Сына Твоего уклони́хся, темже, слезя́, призываю Тя, Владычице,/ скажи мне путь, и пойду́ во истине, поя:/ Препе́-

* сме́тищу — мусорной яме.

тая еси, Богородице, и Благословенная от рода в род.

Песнь 8

Ирмос: Отроки благочестивыя в печи, / Рождество Богородичо спасло есть, / тогда убо образуемое, / ныне же действующее, / вселенную всю воздвизает пети Тебе: / Господа пойте дела / и превозносите Его во вся веки.

Благочестномудренне пожив и присно провидя исход свой, преподобне Николо, / сам себе уготовал еси место во святей пещере, / еже Петру на моление его даровал еси, глаголя: / буди тебе, аще хощеша и якоже Господь восхощет, превозносимый во веки.

Дерзновение имей к Богу и упование по вере непоколебимо, / приял еси прозрения дар, имже уведав по триех днех отшествия Петрово к Богу, / повелел еси тому уготовитися к сицевому исходу, / он же по словеси твоему Святаа Святыа прием, отыде радуясь и поя: / превозносимый Бог во веки.

Тридесат лет по смерти врача свято пожив и верно Господеви поработав, / сторичныа израстил еси плоды, с нимиже отшел еси, блаженне, / ко святыа Святейшему Господу Иисусу, поя и превознося Его во веки.

Твое славное и честное успение людие слышаще, / стекошася от всего града, дати тебе последнее целование / и погребоша тя со слезами, несеннаго с радостию Ангелов на лоно Авраамле, / да тамо со всеми святыми предстоиши Господеви во веки.

Богородичен:

Жизнь временная скончавается, увя мне! / камо несен буду, всех человек окаянейший: / Судия ждет, Книги разгнущася и по делом моим злых часть наследити ми есть известно; / но прежде даже не отыду отсюду со угодником Твоим Николою, / молися, Госпоже, Сыну Твоему благих части мне наследити.

Песнь 9

Ирмос: Всяк земнородный / да възиграется, Духом просвещаем, / да торжествует же Безплотных умов естество, / почитающее священное торжество

Богоматере,/ и да вопиет:/ радуйся, Всеблаженная/
Богородице, Чистая Приснодево.

Всяк от земнородных да подражает житию
Богохвальнаго отца,/ той бо славу временную на
земли презрел и, во славу вечную прешед,/ ныне
радуется, имейя престол недвижим в Небесных
селениях,/ идеже и о нас молит, да будем наслед-
ницы блаженныя жизни.

Всяк, любяй Мя, Мне последует, да будет со
Мною./ Сия Евангельская внушив словеса,/ пре-
блаженный Святоша, возлюбив Бога, Тому
последова/ и ничтоже паче Того любви стяжа в
мире;/ темже ныне живет со Христом в Свете
неприступнем.

Рекий: прославляющаго Мя прославлю,—/ ис-
полни обеща́ние на тебе, святе;/ не токмо бо ты
прослави сама́го дароноше́ньми,/ но и крест
твой, возглавница и власяница славятся от
брата твоего/ и воспомина́ются даже доселе, яко
сла́вная от них сотвори́шася.

От рода в роды память твоя сла́вится, препо-
добне отче:/ труды же и подвиги твоя хвалит
Церковь с нами,/ но и мощи твоя, содержащаяся
во святей пещере,/ являет рака и созывает всех
молити ты ныне/ яко теплаго предстателя и
заступника в неможении нашем.

Богородичен:

От всех пле́мен сла́вимая и почтённая от
Троицы Пресвятыя,/ нам, в песнях хва́лящим Тя,
Чистая Дево, Предстательница буди/ и Заступ-
ница скорая от вражиих навет, да выну поем ти:/
радуйся, Богородице Приснодево.

Светилен:

Храм Духа Пресвятаго был еси,/ и, пришед
Отец с Сыном, обитель в тебе сотвори,/ и тем
Божественных прича́тием райскаго ты гражда-
нина показа;/ в немже ныне от Разумнаго древа
пита́йся и нетленныя славы наслажда́йся,/ помя-
ни и нас, верою кланяющихся раце мощей твоих,
отче преподобне.

Слава, и ныне:

Храм пречистый воплощшемуся из Тебе Слову
была еси, Дево;/ храм мя всякаго беззакония

суща,/ сотвори храм узаконённых повелений Сына Твоего предстательством Твоим,/ да селение Божия благодати быв, достойно воспою Тя,/ яко вся о Бозе могущую, Богоотроковице.

На хвалитех стихиры на 4, глас 1.

Подобен: Небесных чинов:

Великая исправления постнических трудов/ великих отец Печерских привлекоша тя, Николо блаженне,/ к постническому сословию,/ ихже житию поревновал еси усердно,/ и ныне с ними на Небеси живый, моли о поющих тя.

На горе святей, идеже Божия Мати положи свое селение,/ процвел еси, яко финикс сеннолиственный,/ ветвами убо твоих трудов/ покрый от напасти всех, призывающих тя в помощь,/ и подавай от плодов твоих исцеление/ благочестно чтущим всечестную твою память, Николо всеблаженне.

Днесь в памяти твоей, преподобне,/ Лавра Печерская веселится,/ и иночествующих собрание честное, ко гробу твоему пришедшее,/ духовне во псалмах ликовствует,/ похваляючи живущаго в Свете неприступнем/ и хвалимаго во святых Бога,/ с нимиже и ты ныне живёши,/ приемля от Него почесть.

Слава, глас 2:

Древо сый доброветвенно,/ яко кедр в Ливане в дому Божия Матере насажден был еси,/ блаженнейший отче Николо,/ и при водах животных напаяем от учений отец Печерских:/ сению убо твоею осени прибегающия к тебе люди,/ заступи от языческих нашествий, низлагая их востания,/ постави бо тя Господь князя Российстей земли,/ тем, припадающе, молимся,/ страну нашу в мире соблюди/ и обитель сию добре сохрани молитвами твоими.

И ныне:

Спаси от бед рабы Твоя,/ Пресвятая Богородице Дево,/ яко вси усердно по Бозе к Тебе прибегаем,/ яко к нерушимой стене и предстательству.

Славословие великое и отпуст.



В
ТОЙЖЕ
ДЕНЬ

Преподобныя Параскёвы Сёрбскія

Аще ли настоятель изволит или где прилучится храм преподобныя, поем бдение.

НА МАЛОЙ ВЕЧЕРНИ

На Господи, воззвах: стихиры на 4, глас 2:

Пощения путь восприёмши, / житейския бури избегши, Параскёво славная, / ово убо с мудрыми девами / светоносна вошла еси во дворы Господа твоего, / ово же, уневёстившися Ему, / источаеши исцеления притекающим к тебе, / и от душевных недуг избавляеши, / иже к Богу твоими молитвами.

Надежду Христовую и верою возмóгши, / стяжания родителей отбёгши, и со Безплотными ликуеши, / преподобная мати Параскево славная. / Темже исцеление тóчиши по смерти: / твоя бо мощи показáшася, всяким благоухáнием испóлнены, / еже Христос тебе даровá, / Егоже возлюбила еси, / Егоже возжелéла еси, / и Той тя прослави, преподобная; / темже молимся и мы: / стаду своему испроси у Христа Бога велию милость.

Воспещайте убо, новопразднолюбцы, / веселием ликования, / Параскева преславная, и Богоневестная, / и преподобная днесь явися, прежде сокровенная, / якоже древле от земли Крест Живоносный, в земли потайм, обличися. / Темже по долгу чтуще тя, возопиим: / покрый нас от всякия беды и спасай стадо свое всегда.

Слава, глас 4:

Приидите, верных соборы, / духовно возрадуемся, / пением трубным глас восприёмше, / и благодарственными песньми прорцем, глаголюще: / Параскёво преподобная, / сущия в напáстех различных спасай мольбами своими / и всяко убо обстояние отревáй, / благодать же и

милость нам проси,/ яко да молитвами твоими
спасешься,/ радуешься, воспоем вси честныя под-
виги твоя, преподобная.

И ныне, Богородичен:

**Радуйся, стено́ неборимая,/ радуйся, покрóве
миру,/ радуйся, церковь Господня,/ радуйся, све-
ще, радуйся, престоле Божий/, радуйся, всех
радость/ и помощь на враги невидимыя сущи,
Чистая,/ спасение и оружие непобедимое.**

На стиховнах, стихиры, глас 2.

Подобен: ДOME Евфрафов:

**Сияет умно светозарéнии/ светоносный день/
светлэйшими блистаньми,/ вонъже ныне моли/
озаритися поющим тя.**

**Стих: Честна́ пред Господем/ смерть преподоб-
ных Его.**

**От согласия песнь/ воспеваем, честна́я,/ и
почитаем немолчно память твою,/ Параскéво
преподобная,/ Божественную воистинну и свет-
лую.**

**Стих: Дивен Бог во святых Своих,/ Бог Изра-
илев.**

**Твоя ра́ка,/ якоже сокрóвище честно́,/ юже
обстояще/ исцеление грехом нашим моли,/
усердно просим.**

Слава, глас 2:

**Се рака спасения,/ се источник целéбный,/
святыя показашася мощи,/ темже, приидите,
усердно почерпем ныне,/ болящим исцеления/ и
радости, иже во скорбех,/ молитвами ея,
Господеви,/ и Церковь сию нерушиму сохрани.**

И ныне, Богородичен: Спаси от бед:

Тропарь, глас 4 (писан на велицей вечерни).

Слава и ныне, Богородичен.

НА ВЕЛИЦЕЙ ВЕЧЕРНИ

На Господи, воззвах: стихиры, на 8, глас 6.

Подобен: Все отлóжше:

**Возсияла еси, Параскéво,/ добродетельми и
видéнием/ на твёрди яко постница вёрна,/ все-
светлыми и славными заря́ми,/ вся отгоняеши
омрачения еретическия/ и просвещаеши верою и
любовию/ прилежа́ция твоим учением./**

Темже светоносный твой праздник совершаем
любовию,/ Христу со дерзновением молися о
душах наших.

Труды по́стническими/ твою душу вооружила
еси,/ и плотская увядила еси възгнания,/ и ум,
славная, соделала еси/ Божественныя Троицы
жилище;/ и возвысилася еси, о Параскёво,/ иде-
же нетление и покой праведных,/ с нимиже ныне
радуешься/ и во славе предстоиши Христу,/ со
дерзновением моляся о душах наших.

Божественных слез твоих течёнии, Пара-
скёво,/ все потопила еси демонское ополчение,/
яко не́мощно сущо,/ твоими всегда к Богу мано-
вению и сильными восхождении;/ и гордое возно-
шение на землю низвергла еси,/ и возвысилася
еси в Небесныя и благолепныя обители,/ в нихже
со Ангелы водворяешься, предстоящи Христу,/ со
дерзновением молися о душах наших.

Ины стихиры, глас и подобен тойже:

Живуци по смерти, Параскёво блаженная,/
посещаеши вся, с верою притекающия к раце
твоей:/ от лютых страстей покрываеши всегда/ и
от бед избавляеши,/ подаваеши же исцеления
молитвами твоими/ и спасаеши от дёмонскаго
нахождения/ чтущия святую память твою,/ про-
сящи от Бога даровати прощение прегрешений.

Ангел земный на земли явилася еси,/ житие
безплотное в земнѣм теле показала еси,/ отца бо
и матери далече отбѣгши,/ причталася еси ко
Христу, Жениху твоему,/ в черто́зе Небеснем,
Богоневесто, живуци,/ в Калликрати́и имаши
селение крепко,/ идеже исцеления подаеши с
верою притекающим ти,/ и чудес благодать всем
источаеши.

Древле убо одождяше Бог/ израильтяном ман-
ну с Небесе/ днесь же имущим имя твое чест-
но́е/ сугуба бываше пшеница в раздаяние
требующим,/ и нас ныне в твоей памяти, препо-
добная Параскёво,/ хлеба Небеснаго сподоби
приятти благодать/ в благодарение чудес твоих,/ да
радость душам и спасение получим во святей
памяти твоей.

Память твоя во веки пребывает,/ преподобная мати Параскёво,/ и труды потов твоих всюду процветоша,/ аще бо и преставися от земных,/ но со Ангелы предстоящи всегда,/ молиши Христа Бога/ о воспевающих достойно славную память твою.

Слава, глас 1:

Ты слёзными излиянии плотских страстей ражжения угасивши/ и Божественнаго рачения огонь возгнѣвши,/ озарилася еси Царя Христа бессмертием/ и Тому сочталася еси, добрая дево,/ и с Ним в Чертог разумный ныне возшла еси, Параскёво,/ молися о душах наших.

И ныне, Богородичен: Всемирную славу:

Аще не поеши бдение или полиелей:

**И ныне, Богородичен по гласу
или Крестобогородичен:**

Подобен: Прехвальнии мученицы:

Заколение Твое несправедное, Христе, Дева зрящи,/ и, плачущи, вопияше Ти:/ Чадо Сладчайшее, како без правды умираеши?/ како на Древе вѣсиши, Иже всю землю повешей на водах?/ не остави Мене едину, Благодетелю Многомилостиве,/ Матерь и рабу Твою, молюся.

Вход. Прокимен дне. Чтения три преподобническая (зри страницы 791—792).

На литии стихиры, глас 1:

Благодать духовную от Бога/ приемши, преподобная Параскево,/ и по смерти твоя чудеса блистают/ и твоя постничества труды и подвизи/ в миро благовонно предзришася./ И всем подаеши обильно недугом исцеление,/ верою притекающим к раце твоей.

От Вышняго Промысла благодать духовную почерпши,/ и по смерти источаеши медоточных вод струи чудес,/ и напаяя веселием верных сердца и помыслы,/ и прогоняя духа лукавствия,/ моли Христа Бога о творящих память твою святую.

Глас 2:

Желанием Божественныя любви ничтоже мирских предпочла еси,/ и матерни любви небрегла еси,/ и свою утварь в рѹце нищим подала

еси,/ и Евáнгельский глас слышала еси,/ тóщно Христу последовала еси,/ Егоже моли спастися нам.

Слава, глас 2:

Отечество и сродство оставила еси,/ и Христу, Жениху своему, последовала еси,/ преподобная Параскево,/ и Вышний Иерусалим постигла еси,/ и с мудрыми девами, невздрамавшись, вошла еси во мысленный чертог/ и зрѣши Жениха своего красоту,/ Егоже моли о душах наших.

И ныне, Богородичен.

На стиховне стихиры, глас 4.

Подобен: Званный свыше:

Уязвѣвшись желанием Божественным,/ преподобная мати Параскево,/ вся суетная прелестнаго житія возненавидевши,/ Христу последовала еси/ горящим духа желанием,/ мудрование плотскóе умертвивши воздержанием,/ и истинным умилѣнием, и совершенным смирением,/ и прияла еси от Бога дар чудотворений неизреченных:/ Егоже моли спасти и просветити души наша.

Стих: Честна́ пред Господем/ смерть преподобных Его.

Ангельское возжелѣвши житиѣ,/ преподобная мати Параскево,/ мимотекúщее сие житие, яко сон, вменила еси,/ подвизáющиеся воздержáнием, и прилежными молитвами,/ и пощѣнием, и бдѣнием, и низулегáнием, и чистотою;/ сосуд пречист явилася еси Духа Божественнаго/ и светлых, и неизреченных чудес дар от Бога прияла еси,/ Егоже, всеблаженная мати, моли/ спасти и просветити души наша.

Стих: Блажени вси, боящиеся Господа,/ ходящии в путех Его.

Настоящаго житія сего,/ прелестнаго, и маловременнаго, и скоро мимотекúщаго,/ вся отвергла еси/ и пламень огня страстнаго угасила еси./ Непрестанным умилением, и совершѣнным смирением,/ и прилежным молением Безплотных чѣны достигла еси/ и зрѣши откровенным лицем Славу Божию,/ Егоже, преподобная Параскево, моли/ спасти и просветити души наша.

Слава, глас 2:

От корене благаго израстѣ шипокъ, / иже от младенчества твоего возлюбила еси Христа, Параскѣво, / благодатию паче, неже млекомъ, воспитана бывши, / и, на камени стоящи, плоть твою изнурила еси, / и к Богу возвысившиися разумомъ, / и Господне содалася еси добродетельми жилище, / и, с Небесными ликовствуѣши, Христова бывши обитель, / моли спастися душам нашим.

И ныне, Богородичен или Крестобогородичен.

Подобен: Егда от Древа:

Егда Нескверная Агница виде Своего Агнца, / на заклание, яко человека, волею влекома, / плачущи, глаголаше: / безчадствовати Мя ныне тщишися, Христе, рождшую Тя; / что сие сотворил еси, Избавителю всяческих? / обаче воспеваю и славлю Твою, юже паче ума и слова, / крайнюю благодать, Человеколюбче.

Ины стихиры на стиховне, глас 1.

Подобен: Небесных чинов:

Приидите, православных соборы, / и лики составим в память преподобных Параскевы, / та бо мирская оставльши, Евангельский слышавши глас, / и, взявши крест Христов, истинно последова Емуже / и уневестися, Христу, / и с мудрыми девами вниде во Небесный чертог, / моли о творящих память твою.

Стих: Дивен Бог во святых Своих, / Бог Израилев.

Безплотных житие в телеси вѣщнем имела еси, / преподобных житию поревновала еси, / родительную любовь преобидила еси, Божественней любви приобщися, / Евангельским велением последовала еси / и в дом безстрастия достигла еси, / моли о творящих память твою.

Стих: Честна пред Господем / смерть преподобных Его.

Чинѣм постническим последова усердно, / и преподобным сожительница была еси, / удалившия мира и мирских, / и обогатися Божественными деяньми, / апостольскому учению последовавши, / и Христу приведесе невеста, /

Небесною красотою украшенна, / моли о творящих память твою.

Слава, глас 6:

Одесную Спаса предста, / дево преподобная Параскево, / одеяна добротою пощения / и преукрашена елеем чистоты, / и вопиющи к Христу в радости, свещу держащи: / во благоухание мира Твоего текох, Христе Боже, / яко уязвихся Твоею любовию аз, / не отлучи мене Чертога Твоего, Женише Небесный, / той молитвами и нас, Всесильне, спаси милостию Твоею.

И ныне, Богородичен.

Тропарь, глас 4:

Пустынное и безмолвное житие возлюбивши, / и во след Христа, Жениха твоего, усердно потекши, / и Того благое иго во юности твоей вземши, / Крестным знамением к мысленным врагом мужески вооружившись, / постническими подвиги, постом, и молитвами, и слезными каплями / углие страстей угасила еси, достославная Параскево: / и ныне в Небесном чертоге / с мудрыми девами предстоящи Христу, / моли о нас почитающих честную память твою.

Слава, и ныне, Богородичен:

Еже от века утаенное:

НА УТРЕНИ

На Бог Господь: тропарь святых дважды.

Слава, и ныне, Богородичен.

По 1-м стихословии седален, глас 4.

Подобен: Скоро предвари:

Жениха возлюбивши, Творца и Бога, / жениха же тленнаго оставила еси, честная Параскево, / и, радуящися, претерпела еси постныя подвиги: / темже и, венцы носящи, к Божественному чертогу возшла еси, / испрошающи всем грехов оставление.

Слава, глас 8.

Подобен: Повеленное тайно:

Иже во искушениях и скорбех суще, к твоему храму притекающе, / приемлют честныя исцеления / от еже в тебе живущия Божественныя благодати, Параскево преподобная, / ты бо присно миру источаеши исцеления.

И ныне, Богородичен:

Деву Всенепорочная, Яже Пресущнаго Бога рождшая, / со преподобною Того непрестанно моли / оставление прегрешений и исправление жития дати нам прежде конца, / верою и любовию поющим Тя по долгу, / едина Всепетая.

По 2-м стихословии седален, глас 1:

Непорочная а́гница честна́я / Го́сподеви сочта́ся та́инственно в ч́истем житии, / добро́тою Богоданною себе украсивши. / Темже и прият благодать исцеления, / уврачующи страсти протекающих к ней силоу духовною.

Слава, глас 4.

Подобен: Удивися:

Ходивши по стезе узтей, пространнаго ра́я широту достигла еси, / идеже радость празднующих, идеже Древо Животное, / нас непрестанно поминаючи, чтущих твое усение.

И ныне, Богородичен:

Матерь Тя Божию молим вси, / Деву воистинну и по Рождестве явльшуюся, / любовию прибегающих к Твоей благодати: / Тебе бо има́мы грешнии Предстательницу, / Тебе стяжахом в напастех спасение, / Едину Всенепорочную.

Посем, Хвалите Имя Господне: Псалом избранный преподобнический.

Величание:

Ублажаем тя, преподобная мати Параскево, / и чтим святую память твою, / ты бо мо́лиши за нас Христа Бога нашего.

По полиелеи седален, глас 8:

Предъизбранная от Бога, преподобная мати Параскево, / жития треволнений и мяте́жа мирскаго стра́стных помышлений избѣгши, / ко пристанищу жития достигла еси, / и со Ангелы песнослова́и Изба́вителя Христа Бога, / моли непрестанно о нас, да благодать и милость дарует нам, / чтущим любовию святую память твою.

Слава, и ныне, Богородичен:

Радуйся, Ангелом радость мира приѣмшая, / радуйся, рождшая Творца Твоего и Господа, / радуйся, сподобльшаяся быти Мати Божия.

Таже степѣнна. 1 антифон, 4-го гласа. Прокимен: Дивен Бог во святых Своих, Бог Израилев. Стих: В цѣрквах благословите Бога, / Господа от источник Израилевых. Всякое дыхание: Евангелие от Матфея, зачало 104.

По 50-м псалме, стихира, глас 8:

Всяк язык да подвижится / к похвалению Христовы красныя невесты, / честныя голубицы, позлащенныя Духом Святым: / та бо возлюби пустынное житие, / бысть Ангелом собеседница, девственная похвала, / юже Ангели восхвалиша / и человечестии роди, блажаще, вопием: / радуйся, заступнице сущим в бедѣх и обуреваемым пристанище, / преблаженная Параскево, / ты бо последовала еси твоему Жениху Христу, / подающему миру велию милость.

Канон Богородицы, со ирмосом на 6.

И преподобныя 2 канона, на 8.

Канон преподобныя, глас 6.

Песнь 1

Ирмос: Яко по сѹху пешествовав Израиль / по бѣдне стопами, / гонителя фараона / видя потопляема, / Богу победную песнь, / поим, вопияше.

Моего разума твоими молитвами мрак отженї, Параскево преподобная, / да воспю славную твою память, / и светоносную, и блаженную песньми.

Яко река устремися от Сиона, славная Параскево, / напоила еси зело Божественными струями верных сонмы, вопиющи: / Господеви поим песнь новую.

Божественными сиянии душу твою озаривши, Параскево, / сладострастие плоти воздержания попалила еси огнем, / поющи истинную песнь Христу.

Богородичен:

Светлыми лучами Твоего Сына, Богородице, / просвети омраченную мою душу / и страстей смущение твоими, Чистая, укроти ходатайствы.

Ин канон преподобныя, глас 8.

Песнь 1

Ирмос: Воду прошѣд яко сушу, / и египетскаго зла избежав, / израильтянин вопияше: / Избавителю и Богу нашему поим.

Ликующи, мати, на Небесех / и твоему Жениху Христу, предстоящи присно со Ангелы, и пророки, и со апостолами, / и со женами преподобными, о нас молися.

Пост возлюбивши и чистое смирение, дево, / Бога Истинного возвеселила еси: / Тому непрестанно о нас молися.

Радостный ти Христов глас прииде, / на земли мольбу деющей, мати честная, / и радости наполнилася еси, / Сего песнями за ны молящи.

Богородичен:

Чини Тя Ангельстии и человечестии, / Безвестная Дево, хвалят непрестанно: / Зиждителя бо их яко Младенца на руку Твою понесла еси.

Катавасия: Отверзу уста моя:

Песнь 3

Ирмос: Несть свят, / якоже Ты, Господи Боже мой, / вознесый рог верных Твоих, Блаже, / и утвердивый нас на камени / исповедания Твоего.

Ты исполнилася еси, мудрая мати Параскево, Божественного Духа / и явилася еси, питающи богато благочестия сладостию, / животным словом зрящая к тебе.

От повелений Божественного сияния просветила еси вся, блаженная Параскево, / отгнавши всю еретическую злобу, Жизнодавцу Христу воспеваючи: / свят еси, Господи.

На гору Божественных добродетелей востекла еси, Параскево, / и, во облак видений приникши, сочеталася еси с Богом, / разумныя скрижали приими закона благодатнаго.

Богородичен:

Се лествица Иаковля, юже виде иногда утверждёну, / на нейже утверждашеся Бог, / светоносна, Чистая, явися девствующи.

Ин

Ирмос: Ты еси утверждение / притекающих к Тебе, Господи, / Ты еси свет омраченных, / и поет Тя дух мой.

Испроси, Параскево, невесто Христова славная, / грехов прощение подати верою хвалящим тя.

Бéгаючи, удалилася еси / и вселилася еси в пустыни, и горах присно, и вертепех, / Богу угождаючи.

Обрела еси, егоже возлюбила еси от души, пречестная Параскево, / в широте пустыни сокровище потáенное.

Богородичен:

Тебе вси стяжахом, прибежище и стéну нашу, христиане, / и Тя славим немóлчно, / Мати Безневестная.

Ин икос:

Чудесем источник отвéрзеса, / приидите вси, почерпнём ныне воды, точащия исцеления, / яви бо чудеса преславная Параскева всем, / Богу сию прославляющу яко присну Ему рабу суцу, / сего ради обрете чудесем благодать Божиим велением.

Седален, глас 4:

Явилася еси, преподобная Параскево, Церкви, яко иное солнце, / озаряючи сию молниями чудес твоих / и просвещаючи верою вопиющия ти: / радуйся, постниц похвало и дев удобрение.

Слава, и ныне, Богородичен:

Пречíстеи руце Твои, Дево Мати, простёрши, / покрый уповающия на Тя и Сыну Твоему зовущия: / всем подаждь, Христе, милости Твоя.

Крестобогородичен:

На Древе вíдящи воздвйжена Сына Твоего, Пречистая, / утробою матернею разтерзáема, жалостно зывала еси: / увы Мне, како зашел еси, Свете Мой безлетный.

Песнь 4

Ирмос: Христос моя сила, / Бог и Господь, / Честная Церковь / Боголепно поет, зываючи, / от смысла чиста о Господе празднуючи.

Пощёнием, преподобная Параскево, себе очистивши, / вся света исполнилася еси, и вся Боговмéstна показала еси, / и вся явилася еси Духу сопричáстна.

Гладом уморяючи люте злое юности играние, Параскéво блаженная, / и постническия терпíши

болезни, / от совести чисты о Господе веселящися.

Облиставши, славная, жития исправлении, / обошренá явилася еси, яко Христов меч, сседающа демонская ухищрения, / Божественным Духом укрепляема.

Богородичен:

Светильник всесветлый, Божественная трапéза, / Божие селение, кивот и жезл, процветши в мире Христа, / Ты явилася еси, Мати Дево.

Ин

Ирмос: Услышах, Господи, / смотрения Твоего таинство, / разумех дела Твоя / и прославих Твое Божество.

Несквэрно зерцáло и свято помыслом себе сотворши, / яко светило, присно сияющи посреде постниц, славная.

В телесном обнажении солнечным попалением старáла еси за любовь Жениха твоего / и мрáза студéность претерпела еси.

Всенóщным бдением, и молитвами крепкими, и стенáньми, / плоти увядíла еси движения, / преблаженная мати.

Богородичен:

Христа, Егоже родила еси, Пречистая Дево, / Того умоли рабом Твоим даровати прегрешений оставление.

Песнь 5

Ирмос: Божиим светом Твоим, Блаже, / ўтренюющих Ти дýши любовию озарí, молóся, / Тя вéдет, Слове Божий, / Истиннаго Бога, / от мрака греховнаго взывáюща.

Светоподáтельными твоими блистаньми, Параскéво, / мрачную тьму потребила еси еретíческую, / и Богознания светом озарíвшись, просвещаеши мира концы.

Тебе вси, заступницу имуще, достойно славим, Параскево, / ты бо явилася еси Ангелов собеседница и дев украшение, / мати преподобная.

Явилася еси, мати Параскéво, светозарна, / заблуждших путевоительница, вла́ющих правительница, / и колеблющихся в лютых твердость, и стена нерушима.

Богородичен:

Доброта Иаковля, юже возлюбѣ Бог и вселитися избра, / земных слава и прибежище грешащих, / Богородице, Ты явилася еси.

Ин

Ирмос: Утренююще вопиѣм Ти, / Господи, спаси ны: / Ты бо еси Бог наш, / разве Тебе иногo не вѣмы.

Дне и мира сопротивная ведящи, / желанія лоботворца демона любити не восхотела еси.

Мня преодолѣти твоей любви и чистоте, / но смех явился козньми прелукавый.

Погребоша твое тело, якоже нетлѣемо, / ты бо яко безплотна пожилá еси, Богоневестная.

Богородичен:

Деву по Рождестве поем Тя, Богородице, / Ты бо Бога плотию миру родила еси.

Песнь 6

Ирмос: Житѣйское море, / воздвизáемое зря напáстей бурею, / к тихому пристáнищу Твоему притѣк, вопию Ти: / возведи от тли живóт мой, / Многомилостиве.

Сияеши, яко солнце, / Богозарны лучи, преблаженная Параскѣво, чудес испущающи / похваляющим твоя постныя труды и дивныя подвиги.

Пречистую Владычицу Богородицу похваляющи чѣстно, язýком твоим, Богомудрая Параскево, / воспевши словеса светозáрная, / верных сонмища мýдре сердца умащáющи.

Написанный всечестный и святыи образ любезно лобызаеши, / безбожных же писания потребляеши, и тех богомерзская и безбожная повеления поплева́еши, / и возвещаеши честь и поклонение образа Христова.

Богородичен:

Вся хотѣнием Своим составивый Бог и содержаи всяческая, / описáнием телес на Твоих руках держитса, Пречистая, / Иже Божественным Существом неописанный.

Ин

Ирмос: Молитву пролию ко Господу / и Тому возвещу печали моя, / яко зол душа моя исполнися, / и живóт мой áду приближися, / и молюся, яко Ибна: / от тли, Боже, возведи мя.

Мирския молвы попра́ла еси, мира Содетелю предстоиши, / возлетевши крýлы златоукрашен-

ными, мати, / от трудов пощения и молитв,
Богоблаженная.

Богоугодного твоего ради жития, пречестная, / яко дар освящен, отечеству подаешися твоему, Параскево, / к западу пришедши, всеславная.

Несказанно житие измлада возжелевши, / невидима бо в земли потаена, / восходящи, преподобная, на удивление бысть, Богу явльшу тя.

Богородичен:

Да избудем от лютых прегрешений молитвами Твоими, Богородице Чистая, / и да улучим Божие сияние / из Тебе неизреченно воплощенного Сына Божия.

Кондак, глас 6:

Святую вси заступницу сущим в бедах, / благочестно воспоим Параскеву всечестную: / та бо, житие оставльши тленное / и нетлеемое прият бо веки, / сего ради славу обрете, / чудес благодать Божиим велением.

Икос:

Приидите, постническое сословие, / приидите, чистоты рачителе, приидите, празднолюбцы всяк возраст, / песнями духовными похвалим пустыннолюбную горлицу, / постников похвалу, дев украшение, молчальников удобрение, / печальных утешительницу, болящих посетительницу / и сущим в бедах скоропослушную помощницу, / Богомудрую Параскеву, точащую всем исцеления, / обрете бо благодать чудес Божиим велением.

Песнь 7

Ирмос: Росодательну убо пещь / содела Ангел / преподобным отроком, / халдеи же опаляющее веление Божие мучителя увещая вопити: / благословен еси, Боже отец наших.

Исправляющи ты слово Жениха Христа, / Тому невозвратным желанием последовала еси, господоименитая Параскево, вопиющи: / благословен Бог отец наших.

Доброты тлеущия, Параскево преподобная, небрегла еси, / смотряючи тамо сущаго воздаяния, / и прияла еси славу нестареющуюся, Божию красоту и веселие.

Реки твоих словес медотóчных, Параскево, /
человеком дúши веселия Божественнаго
исполняеши, / хвалослóвлящим песньми Бога
препрославленнаго.

Богородичен:

На Тебе соде́яся великое, Дево Мати,
таинство: / Сын Божий из чрева Твоего воплотí-
ся и всем явíся, / Емуже, веселящеся, поем: /
отцев Боже, благословен еси.

Ин

Ирмос: О́троцы еврейстии в пещí / попра́ша пла́мень
дерзнове́нно, / и на рóсу огонь преложи́ша, вопиюще: /
благословен еси, Господи Боже во веки.

Зáйде, якоже солнце, преподобная мати, /
просвещаеши же чудесы верою теплою и любо-
вию поющих: / благословен Бог отец наших.

Испóлнишася вся страны́ твоего благоухания
во обретение мощей твоих, / имже верою пети
повелеваеши, преподобная: / благословен Бог
отец наших.

Обрета́ешися, мати, хромым исправление, /
ибо ногою бо́лэвый, скака́я, вопияше, зовый
немóлно: / благословен Бог отец наших.

Богородичен:

Се, Юже проречé, Дево, Духом Святым вели-
кий Исаия, / во чреве Бога заченши, родила еси: /
и благословен, Пречистая, Плод Твоего чрева.

Песнь 8

Ирмос: Из пла́мене преподóбным рóсу источíл еси / и
пра́веднаго жéртву водою попали́л еси, / вся бо твори́ши,
Христé, тóкмо еже хотéти, / Тя превозно́сим во вся веки.

По законе отчи, закон отéческий, всеблажен-
ная, истинно нося́щи, / дéмонская лица поплева-
ла еси, Господне воображение благочестно
лобызаючи, / еже прим в мире, явившася от
Девы Отроковицы: / Егоже превозносим во веки.

Ум Божествен и Духа Пресвятаго гусль
всесочетáнна, / славíй добропéснивый, верных
похвала верховная, / Православия стóлпе и ут-
верждение мудрое, церковное правило, / мона-
хинь слава и всех преподобных удобрение яви-
лася еси, / поючи Христа во веки.

Мирополо́жница Духа Пресвятаго, мати, показала еси / изли́нием мира благовонных твоих и мудрых учений, потребляючи прелести злосма́рдную тлю / и благово́нствуя нравом твоим, Параскево, Честну́ю Церковь, зовуци не-престанно: / песньми Тя превозносим, Христе, во веки.

Богородичен:

Божия гора тучная, / еяже пра́отец Давид уясни́в, древле поя пророчески, ты явилася еси, Дево, / от неяже отсечеса Камень краеугольный Христос и сокруши крепость идольскую: / Того не-престанно поем и превозносим во веки.

Ин

Ирмос: Царя Небеснаго, / Егоже поют во́и Ангельстии, / хвалите и превозносите во вся веки.

Укрепльшися умом Безплотных, / желанием вдала еси тело посту / и живещи во веки.

Пребогатая в жена́х яви́ся, блаженная Параскево, / поюци Творцу: / Тя превозносим во веки.

Сущу разслабленному в лета мно́га, честна́я, исцеления подаде недуга: / тем ты воспеваше, преподобная, во веки.

Богородичен:

Соше́дшаго с Небес и в ложесна́ Девическая всельшася Господа, / пойте и превозносите Его во веки.

Песнь 9

Ирмос: Бога / человеком невозможно ви́дети, / на Негоже не смеют чини Ангельстии взирати, / Тобою бо, Всечистая, явися человеком / Слово Воплощенно, / Егоже величающе, / с Небесными вои / Тя ублажаем.

Посóбствующу ты по Христове Церкви человекоубийца зрети не могий, / искушения тебе простирает: / обаче непрекло́нна пребыв и, мысленным врагом противилася еси до́блественно, / поклоняющийся образу Христову, Богомудрая Параскево.

Укра́шена несказанною, Богомудрая, доблестию / и упещре́на сияньми светлейшими, / радостно, преблаженная, предстоиши Престолу

Зиждителя Бога, / идеже празднующих глас, Богомудрая Параскево.

Твоих подвигов достойную прияла еси почесть, / и венченосица ныне на Небесех со Ангелы ликовствующи, / идеже пророческий сонм, и апостол, и мученик воистинну воинства многа, / идеже патриархов ликостояния, / поминай нас, преподобная мати Параскево.

Богородичен:

Поборствующи людем верным во бранех, / воинству нашему на сопротивныя даждь победы, Богородительнице, / покрывающи от всякаго навета врагов, / Мати Бога Слова Неискусобрачная Чистая, / да Твоего Сына поюще, Тя величаем.

Ин

Ирмос: Воистинну Богородицу / Тя исповедуем, / спасении Тобою, Дево Чистая, / с Безплотными лики Тя величающе.

Не престай молящи Христа, мати преподобная, / избавити ны от бед рабы твоя, / иже от души поющия тя и величающия.

Красота дев явилася еси, преподобная, / яко Ангельскому житию поревновала еси; / не престай молящи о отечестве твоём.

Сочеталася еси со Безплотными ликостоянии / и Владыце предстоиши, радующися, / с мудрыми девами, Сему молящися о мире.

Богородичен:

Радости исполни мя и веселия, Дево, / яко приимши вину радости: / Ты бо источила еси всем радование.

Светилен.

Подобен: Жены услышите:

Яко Божественный свет, Параскево, песненно Церкви явилася еси, / красотою сию озаривши светом лица твоего, / предобрая невесто Христова: / к Немуже непрестанно молися о всех нас.

Слава:

Подобен: Небо звездами:

Ангельскаго жития желая, удалила еси себе в пустынях / и, страсти покоривши плотския, рав-

ноангельна показася, / преподобная мати наша Параскево.

И ныне, Богородичен:

Дрѣвле дарованную ми ризу банею Крещения осквернив страстнѣм блужением, / ужасаюся, окаянный, час помышляя воистинну Божественнаго Суда, / Дево Всенепорочная, предстани тогда и избави мя страшнаго прещения.

На хвалитех стихиры на 4, глас 8.

Подобен: О преславнаго чудесе:

Грядите вси, Богомудрии, от земли дальния, / раце прикоснувшися преподобныя / и прошения своя от души приносяще, / примите избавление от страстей различных: / инии же грехов разрешение, / и к Богу присвоение, / и всяку пользу нам ко спасению.

Глас 1.

Подобен: Небесных чинов:

Параскево Богомудрая, / воздержанием многим, молитвою и молением Богови соединися / и непобеждена пребысть коварствы борителя. / Темже и со Ангелы ликовствуеши на Небесех, / отнюдуже почитаем тя / и Божественную память твою, сошедшися, празднуем.

Ты, повинующися манием Всевидца Бога, / от Негоже благодать прияла еси / действовати чудесы и прогнати духи лукавствия. / Темже почитаем тя / и святую память твою достодожно верою празднуем, Богоблаженная.

Воздержанием мудрование плотскѣе умертвила еси, / постом и добродетелей совершением, / отнюдуже явися, яко жива, по смерти воистинну. / Смерть бо тебе, яко сон, вменися, / к Богу прешедши и в руце Его душу предавши, / Егоже моли спасти души наша.

Слава, глас 8:

Отечество, и срѣдство, и имение оставльши, Параскево, / и нечестия вся мирская возненавидевши, / Бога Единого возлюбила еси, / Емуже и пощением уневестилася еси / и была еси Святаго Духа жилище, / от Негоже светолѣтием просветившися, / Того моли спасти души наша.

И ныне, Богородичен: Владычице, прими:

Славословие великое. И отпуст. Аще ли не поем бдения или полиелея, тогда поем стиховну во Октоихе.

Слава, преподобней, глас 2:

Преподобная мати Параскево, / измлада себе самую возложивши Христу Богу / и от Него укрепляема, плотския страсти покорила еси, / и худшее поработила еси лучшему: / темже и венец триплетенный прияла еси, / моли спасти души наша.

И ныне, Богородичен или Крестобогородичен.

Подобен: Егда от древа:

Егда Нескверная Агница виде Своего Агнца, / на заклание, яко человека, волею влекóма, / плачуши, глаголаше: / безчадствовати Мя ныне тщишия, Христе, Рождшую Тя, / что сие сотворил еси, Избавителю всяческих? / обаче воспеваю и славлю Твою паче ума и слова / крайнюю благодать, Человеколюбче.

На литургии: Блаженны, от первого канона песнь 3 и от второго песнь 6. Прокимен, глас 4: Дивен Бог во святых Своих, Бог Израилев. Апостол к Галáтом, зачало 208: Братие, прежде пришествия веры: Аллилуия. Терпя, потерпéх, Господа, и внят ми. Евангелие от Матфея, зачало 104: Рече Господь притчу сию: Уподобися Царствие Небесное десяти девам: Причастен: Радуйтесь, праведнии:



В
ТОЙЖЕ
ДЕНЬ

Преподобнаго Космы́ Яхромскаго

Службу зри 18 февраля.

Тропарь, глас 4:

Горняго желая премирнаго жития, / дóльняя возненавидел еси, / и, взем крест свой, последовал еси Христу, / и в пустыню вселился еси, досточудне, / в ней подвизася в пениих, в бдениих и пощениих. / Темже в тя вселися Пресвятый Дух, / но яко имея дерзновение ко Христу Богу, / испроси людем православным здравие и спасение / и не забуди посещая чад своих, / совершающих священную память твою, / Космо́, преподобне отче наш.

Кондак, глас 8.

Подобен: Взбранной:

Душевныя страсти из корене исторгая, / в пустыню вселился еси, преподобне, / и неболезненную жизнь в болезнях восприял еси, / болезнем же лютым уставляеши озлобления просящим у тебе с верою. / Темже разреши болезни наша душевныя и телесныя, да зовем ти: / радуйся, Космо Богомудре.

